

NACRT

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06), člana 5. stav 2. Zakona o budžetima u Federaciji Bosne i Hercegovine („Službene novine Federacije BiH“, broj: 19/06, 76/08 i 5/09,32/09,9/10,36/10 i 45/10)) i člana 24. Statuta Općine Kladanj („Službeni glasnik Općine Kladanj“, broj: 9/11), Općinsko vijeće Kladanj, na sjednici održanoj 18.11.2011.godine, d o n o s i

O D L U K U **o izvršenju Budžeta Općine Kladanj** **za 2012.godinu**

I OPĆE ODREDBE

Član 1.

Ovom Odlukom uređuje se struktura prihoda i primitaka, rashoda i izdataka Budžeta Općine Kladanj za 2012.godinu (u daljem tekstu: Budžet), njegovo izvršenje, prava i obaveze korisnika budžetskih sredstava, upravljanje prihodima i izdacima Budžeta, te prava i obaveze korisnika budžetskih sredstava i nadzor.

Član 2.

Budžet se sastoji od općeg i posebnog dijela. Opći dio Budžeta se sastoji od računa prihoda i rashoda. Posebni dio budžeta sastoji se od plana rashoda i izdataka budžetskih korisnika. U bilansu prihoda i izdataka iskazuju se porezni i neporezni prihodi, drugi prihodi i primici, prenesena sredstva, te sredstva utvrđena za finansiranje javnih izdataka na nivou općine Kladanj na osnovu zakonskih i drugih propisa.

Član 3.

Budžet se odnosi i važi za fiskalnu 2012.godinu (u daljem tekstu: Fiskalna godina). Fiskalna godina počinje 1. januara, a završava se 31.12.2012.godine.

Član 4.

Budžet je procjena godišnjih prihoda i primitaka, te utvrđenih iznosa izdataka i drugih plaćanja Općine Kladanj, koje donosi Općinsko vijeće Općine Kladanj.

Član 5.

Budžetski izdaci podmiruju se iz prihoda i primitaka utvrđenim ovom Odlukom i prenesenih sredstava.

Član 6.

Budžetsko računovodstvo se zasniva na računovodstvenim načelima; tačnosti, istinitosti, pouzdanosti, sveobuhvatnosti, pravovremenosti i pojedinačnom iskazivanju poslovnih događaja. Budžetsko računovodstvo vodi se po načelu dvojnog knjigovodstva i na računima računskog plana budžeta.

Član 7.

Priznavanje prihoda i primitaka, te rashoda i izdataka putem glavne knjige provodi se po načelu modificiranog nastanka događaja. Prihodi i primici priznaju se u onom periodu kada su mjerljivi i raspoloživi, tj. kada su uplaćeni na račun budžeta. Rashodi i izdaci priznaju se u onom periodu kada je obaveza nastala za plaćanje.

Član 8.

Sredstva Budžeta koriste se za finansiranje poslova, funkcija i programa Općinskog načelnika i općinskih službi za upravu, stručnih službi, Općinskog pravobranilaštva, javnih ustanova i ostalih čije je finansiranje iz Budžeta predviđeno posebnim propisima (u daljem tekstu: Korisnici).

II IZVRŠAVANJE BUDŽETA

Član 9.

Sredstva Budžeta osiguravaju se budžetskim korisnicima (u daljem tekstu: korisnici) koji su u posebnom dijelu Budžeta određeni za nosioce sredstava na pojedinim pozicijama. Korisnici budžetska sredstva koriste samo za namjene koje su određene Budžetom i to do visine utvrđene u njegovom posebnom dijelu, a u skladu sa dinamikom priliva sredstava.

Član 10.

Budžet se izvršava u skladu sa ostvarenjem prihoda, a prioritet u izvršavanju budžeta imaju:

1. Servisiranje duga i kamate;
2. Plaće i naknade zaposlenim u organu uprave i Općinskom pravobranilaštvu;
3. Naknade za rad u Općinskom vijeću i radnim tijelima;
4. Izdaci za materijal, usluge i radove neophodni za rad općinskih službi i Općinskog pravobranilaštva;
5. Plaće i naknade budžetskim korisnicima (javne ustanove i javna preduzeća i Vatrogasno društvo);
6. Ostalo.

Iznimno, zbog nedostatka priliva sredstava u Budžet, Načelnik može izmijeniti dinamiku i visinu planiranih sredstava korisnicima Budžeta iz predhodnog stava.

Član 11.

Hitni i nepredviđeni izdaci koji se pojave u toku budžetske godine podmiruju se iz sredstava tekuće rezerve utvrđene Budžetom.

O korištenju sredstava budžetske rezerve odlučuje Općinski načelnik.

Budžetsko izdvajanje za tekuću rezervu ne smije preći 3% ukupnih prihoda, bez primitaka. Općinski načelnik izvještaj o utrošku tekuće rezerve dostavlja Općinskom vijeću kao prilog Izvještaju o izvršenju budžeta Općine Kladanj kvartalno u skladu sa planom i programom rada Općinskog vijeća.

Član 12.

Postupak nabavke roba, radova, stalnih sredstava i vršenja usluga vršit će se u skladu sa Zakonom o javnim nabavkama ("Sl. glasnik BiH", br. 49/04, 19/05, 52/05, 8/06, 24/06, 70/06 i 12/09 i 6/10) u skladu sa drugim pozitivnim propisima.

Član 13.

Općinski načelnik, na prijedlog budžetskog korisnika, može donijeti odluku o prestrukturiranju rashoda u okviru ukupnog iznosa odobrenog za budžetskog korisnika do 10% ukupno odobrenih rashoda za budžetskog korisnika.

Prestrukturiranje iz stava 1. ovog člana može se odobriti po vrsti rashoda kako slijedi:

- tekući izdaci po osnovu plaća, naknada, izdaci za materijal i usluge;
- tekući transferi i plaćanje kamata;
- subvencije, pomoći i naknade.

U okviru odobrenog budžeta, preraspodjela sredstava izuzetno je dozvoljena između budžetskih korisnika o čemu odlučuje Općinski načelnik na prijedlog Službe za finansije, poduzetništvo i lokalni ekonomski razvoj.

Član 14.

Ako se tokom godine, na osnovu zakona ili drugog propisa poveća nadležnost korisnika, što zahtjeva povećana sredstva ili se osnuje novi korisnik, sredstva za njegove troškove mogu se osigurati iz Tekuće rezerve, a odobrava ih Općinski načelnik.

Ako se tokom godine, na osnovu zakona ili drugog propisa umanjuje nadležnost korisnika, što zahtjeva smanjena sredstva ili se korisnik ukine, neutrošena sredstva za njegove troškove prenose se u Tekuću rezervu budžeta ili na korisnika koji preuzme njegove poslove.

Član 15.

Pogrešno ili više uplaćeni prihodi Budžeta, vraćaju se uplatiocima iz sredstava Budžeta u skladu sa odredbama Pravilnika o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine („Službene novine Federacije BiH“, broj: 3/11).

Član 16.

Sredstva utvrđena za Kapitalne grantove mjesnim zajednicama izvršavat će se po posebnim odlukama Općinskog načelnika, na osnovu zahtjeva i iskazanih potreba tokom godine.

Član 17.

Sredstva utvrđena za finansiranje parlamentarnih grupa koriste se u skladu sa Odlukom o rasporedu sredstava sa pozicije „Transferi za parlamentarne grupe“ Budžeta Općine Kladanj za 2011. godinu („Sl. glasnik Općine Kladanj“, broj: 8/11).

Član 18.

Sredstva utvrđena za isplate naknada za rad u Općinskom vijeću i radnim tijelima Općinskog vijeća isplaćuju se na osnovu Odluke koju donosi Općinsko vijeće.

Član 19.

Sredstva utvrđena za „Izdatke za volonterski rad po osnovu ugovora o volonterskom radu“ izvršavat će se prema Odluci koju donosi Općinsko vijeće.

Član 20.

Sredstva utvrđena za „Podsticaj u poljoprivrednoj proizvodnji“, izvršavat će se prema kriterijima koje utvrđuje Općinsko vijeće.

Član 21.

Izdvajanje sredstava za finansiranje Udruženja vršit će se prema rasporedu utvrđenom na poziciji „Tekući grantovi-transferi“.

Član 22.

Svi korisnici budžetskih sredstava dužni su kvartalno podnositi izvještaj o utrošku odobrenih sredstava Općinskoj Službi za finansije, poduzetništvo i lokalni ekonomski razvoj.

Član 23.

U slučaju nedovoljnog priliva izvornih prihoda i primitaka za finansiranje tekućih izdataka, privremeno se mogu koristiti i prilivi od namjenskih sredstava, s tim da se njihov povrat izvrši najkasnije do kraja fiskalne godine ili do realizacije projekta za koji su sredstva namijenjena. Zatečena sredstva iz prethodne godine na računima mogu se koristiti za izmirenje ukalkuliranih i tekućih obaveza kao i za neizmirene obaveze iz ranijeg perioda.

III FINANSIJSKO IZVJEŠTAVANJE I REVIZIJA

Član 24.

Nalogodavac za izvršenje Budžeta je Općinski načelnik.

Član 25.

Općinski načelnik podnosi izvještaj o izvršenju budžeta kvartalno u skladu sa Programom rada Općinskog vijeća.

Član 26.

Služba za finansije, poduzetništvo i lokalni ekonomski razvoj je obavezna dostaviti Općinskom načelniku Izvještaj o izvršenju Budžeta za predhodnu godinu, a Općinski načelnik je obavezan podnijeti isti Općinskom vijeću na usvajanje u skladu sa Programom rada Vijeća.

Član 27.

Ovlašćuje se Općinski načelnik da može zaključiti ugovore o kreditu na osnovu odluke Općinskog vijeća kojom će se utvrditi i uslovi kreditnog zaduženja, u skladu sa Zakonom o dugu, zaduživanju i jamstvima u Federaciji Bosne i Hercegovine.

IV ZAVRŠNE ODREDBE

Član 28.

Na sva pitanja koja nisu regulisana ovom Odlukom, a tiču se načina izrade, donošenja, izvršavanja budžeta, zaduživanja, duga, računovodstva, nadzora i revizije budžeta, primjenjivat će se odredbe važećih zakona.

Član 29.

Odluka o izvršenju čini sastavni dio Budžeta.

Član 30.

Ova Odluka stupa na snagu danom objavljivanja u "Službenom glasniku Općine Kladanj", a primjenjivat će za fiskalnu 2012.godinu.

OPĆINA KLADANJ
OPĆINSKO VIJEĆE

Broj: 01-14-_____/11
Kladanj, 18.11.2011.godine

PREDSJEDAVAJUĆI
Općinskog vijeća
Nijaz Čorbić, dipl.ing.,v.r.